



Broj/Број: 01/2a-50-1-2-8/07
Sarajevo/Сарајево, 12.06.2007.

ZAPISNIK

8. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 11.06.2007. godine

Sjednica je počela u 14 sati i vodio ju je predsjednik Komisije Slavko Matić.

Sjednici su prisustvovali sljedeći članovi Komisije: Slavko Matić, Milica Marković, Denis Bećirović, Sadik Ahmetović, Sefer Halilović, Azra Alajbegović, te Merdžana Iglica – sekretar Komisije.

Odsutni su bili Milorad Živković, Husein Nanić i Azra Hadžiahmetović.

Sjednici su prisustvovali i pozvani gosti i predstavnici predlagača: ambasadori Dragan Božanić i Nedžad Hadžimusić, te Radomir Bogdanović ispred Ministarstva vanjskih poslova BiH, Ismet Šečić, ispred Ministarstva komunikacija i prometa BiH, Samir Rizvo ispred Ministarstva sigurnosti BiH i Sabrija Šerifović ispred Ministarstva vanjske trgovine i ekonomskih odnosa BiH. Odsutan je bio izvjestilac i predstavnik Ministarstva za ljudska prava i izbjeglice BiH.

Zapisnik je vodila Merdžana Iglica, sekretar Komisije, te studenti-stažisti Mirjana Brčkalo i Lejla Isović.

Predsjednik Komisije je najprije otvorio raspravu o dnevnom redu. Za riječ se javila Milica Marković i postavila pitanje Sporazuma između BiH i Srpske pravoslavne crkve, podsjećajući na svoju intervenciju na posljednjoj sjednici Zastupničkog doma. Radomir Bogdanović iz Sektora za međunarodno pravne i konzularne poslove MVP-a BiH nije imao povratnu informaciju vezanu za ovaj sporazum i nije znao odgovoriti zašto sporazum nije još stigao u parlamentarnu proceduru. Na ovo je Denis Bećirović upitao ko je i zašto zakočio proces davanja saglasnosti za ratifikaciju ovog sporazuma, a predsjednik je predložio kompromisni zaključak da se, ukoliko bude nužno i dokument stigne u parlament, Komisija može sastati i na dan sjednice Zastupničkog doma te razmotriti ovo pitanje te dati prethodnu suglasnost za njegovo ratificiranje.

Potom je predsjednik Komisije predložio sljedeći

DNEVNI RED

- 1) Verificiranje Zapisnika 7. sjednice Komisije za vanjske poslove Zastupničkog doma Parlamentarne skupštine Bosne i Hercegovine održane 21.05.2007. godine;
- 2) Informacija o najvažnijim aspektima djelovanja Vijeća za regionalnu saradnju (RCC) (Izvjestitelj: Ministarstvo vanjskih poslova BiH);
- 3) Davanje suglasnosti za ratificiranje Evropske povelje o regionalnim ili manjinskim jezicima (Predlagatelj: Ministarstvo za ljudska prava i izbjeglice BiH);
- 4) Davanje suglasnosti za ratificiranje Konvencije za objedinjavanje određenih propisa u međunarodnom zračnom prevozu (Predlagatelj: Ministarstvo komunikacija BiH);
- 5) Davanje suglasnosti za ratificiranje Sporazuma između Vijeća ministara Bosne i Hercegovine i Vlade Republike Hrvatske o suradnji u nadzoru državne granice (Predlagatelj: Ministarstvo sigurnosti BiH);

- 6) Davanje suglasnosti za ratificiranje Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006) (Predlagatelj: Ministarstvo vanjske trgovine i ekonomskih odnosa);
 - 7) Usmena informacija predsjedatelja Komisije o susretu sa g. Ali Bagheri-om, generalnim direktorom odjela za Centralnu i Zapadnu Evropu Ministarstva vanjskih poslova Islamske Republike Iran, predviđenom za 11.06.2007. godine;
 - 8) Usmena informacija predsjedatelja Komisije o susretu sa gđom Marielouise Beck, parlamentarkom njemačkog Bundestaga i članicom Grupe prijateljstva Bundestaga sa Bosnom i Hercegovinom, predviđenom za 12.06.2007;
 - 9) Tekuća pitanja.
- Ovako predloženi dnevni red je jednoglasno usvojen.

Ad.-1. Verificiranje Zapisnika 7. sjednice Komisije za vanjske poslove

Nije bilo rasprave i primjedbi i zapisnik je jednoglasno prihvaćen.

Ad.-2. Informacija o najvažnijim aspektima djelovanja Vijeća za regionalnu saradnju (RCC) (Izvjestioci: ambasadori Nedžad Hadžimusić i Dragan Božanić iz MVP-a BiH)

Najprije je ambasador Nedžad Hadžimusić informirao članove Komisije o realizaciji inicijative da Sarajevo bude središte Vijeća za regionalnu saradnju (RCC), što u stvari predstavlja nastavak aktivnosti dosadašnjeg Pakta stabilnosti za jugoistočnu Evropu koji se odlukom EU gasi krajem godine jer u BiH i regionu više nije potreban. BiH je bila najbolji predsjedatelj SEECP-a 2004.godine i vodila je u tom periodu snažnu kampanju, te time dokazala svoj smisao za saradnju u okviru Pakta stabilnosti, a sama činjenica da se on gasi predstavlja izraz zrelosti cijelog regiona i naše zemlje u napretku prema eu integracijama. U tom kontekstu je dobra vijest da je Sarajevo dobilo sjedište RCC-a u takmičenju sa Beogradom. Nadalje je g. Hadžimusić napomenuo važnu činjenicu da je riješen problem smještaja RCC-a, tako što je premijer Špirić obećao prostorije u novosagrađenoj zgradi Vijeća ministara za ovu namjenu. Centar bi trebao početi sa radom 1. februara 2008 godine. Nakon svog kolege, riječ je uzeo ambasador Dragan Božanić i istakao da je dobijanje sjedišta Sekretarijata RCC-a u Sarajevu veliki uspjeh, ali i ogroman posao iza kojeg stoji diplomatija BiH. Također je napomenuo da će sva saradnja u regionu biti usmjeravana preko Sarajeva, što dodatno daje na značaju ulozi naše zemlje u približavanju EU. Istakao je da Nacrt Sporazuma kojim je regulisan status Sekretarijata RCC-a i koji je rađen po uzoru na sličan dokument Savjeta zemalja Baltičkog regiona sa sjedištem u Štokholmu mora biti gotov do kraja juna 2007. U radu RCC-a se predviđa upošljavanje 25-30 savjetnika i rukovodilaca iz svih 11 zemalja regiona. G. Božanić je podsjetio da se Pakt stabilnosti ne gasi u potpunosti, već poprima nove oblike kao što je intenzivnija parlamentarna saradnja iako je sjedište za ovaj vid saradnje u Sofiji. Predsjednik Komisije je gostima postavio pitanje o obavezama i pravima BiH prema Uredu RCC-a. G. Božanić je objasnio da sve zemlje, čak i izvan regiona, koje žele učestvovati u projektima i koje uplate 50-60.000 Eura godišnje mogu postati članice ovog tjela. BiH će za funkcioniranje RCC-a izdvajati 60.000 godišnje Eura za ovo tijelo, što je minimalna kontribucija jer uz to udomljavamo i Sekretarijat RCC-a. Potom je Denis Bećirović iznio svoje mišljenje da je to dobra vijest, ali da ne postoji razlog za euforiju, s obzirom na loše poruke koje BiH šalje van svojih granica zbog neprovođenja suštinskih reformi. G. Hadžimusić je na ovo odgovorio da je u odsustvu dobrih vijesti i ovo dobra vijest, te da će Sarajevo na ovaj način postati „mali regionalni Brisel“. Milica Marković je podržala inicijativu RCC-a i rekla kako je vijest o dobijanju sjedišta ovog tijela znak da BiH uvažavaju u regionu. Predsjednik je na kraju zaključio da Komisija cijeni dobijanje sjedišta i želi podržati rad svih onih koji su učestvovali u ovom projektu i doveli do ovog očekivanog i uspješnog rezultata. Uz zahvalnost gostima na iscrpnim informacijama, obećao je dalju podršku Komisije u realizaciji ove inicijative i izrazio nadu da će Komisija za vanjske

poslove i MVP BiH biti u stalnom kontaktu i tijesno sarađivati kad je u pitanju realizacija Sporazuma o RCC-u.

Ad.-3. Davanje suglasnosti za ratificiranje Evropske povelje o regionalnim ili manjinskim jezicima

Predsjednik Komisije je na početku rasprave o davanju saglasnosti za ratificiranje svih sporazuma na ovoj sjednici zamolio Radomira Bogdanovića da iznese mišljenje MVP-a BiH o pravnoj valjanosti ovih dokumenata. G. Bogdanović je potvrdio kako su sva četiri sporazuma prošla zakonsku proceduru i dobila sve prethodne saglasnosti za ratifikaciju, te predložio Komisiji da da svoje pozitivno mišljenje o njima. Istovremeno je napomenuo da potpisivanje ovih sporazuma predstavlja i uvjet za članstvo BiH u EU.

Za Evropsku povelju o regionalnim ili manjinskim jezicima nije se pojavio izvjestitelj iz Ministarstva za ljudska prava i izbjeglice BiH. Predstavnik MVP-a BiH, g. Bogdanović je istakao kako je sva potrebna procedura provedena i prikupljene su sve potrebne saglasnosti za ratifikaciju ove povelje, dok je sekretar Komisije, Merdžana Iglica podsjetila članove Komisije da je ratifikacija ova povelje jedna od preostalih postprijemnih obaveza koje BiH ima prema Vijeću Evrope. Ipak je preovladalo mišljenje, na inicijativu Denisa Bećirovića, da se o ovom dokumentu Komisija ne izjašnjava, jer nadležno ministarstvo nije poslalo svoje predstavnike. Predložio je i slijedeći zaključak: Komisija je pokazala potpunu spremnost da se da saglasnost za ratificiranje, ali zbog neprisustva predstavnika nadležnog ministarstva, ova tačka dnevnog reda se odlaže za dan sjednice Zastupničkog doma ili za sljedeću sjednicu Komisije. Komisija također zahtijeva ozbiljniji odnos predstavnika Vijeća Ministara BiH prema radnim tijelima Parlamentarne skupštine BiH. Ovaj zaključak je jednoglasno usvojen.

Ad.-4. Davanje suglasnosti za ratificiranje Konvencije za objedinjavanje određenih propisa u međunarodnom zračnom prevozu

Ismet Šečić, izvjestilac iz Ministarstva komunikacija i transporta BiH je u uvodnim napomenama rekao da gore navedena konvencija, ili tzv. Montrealska konvencija iz 1999.godine, zamjenjuje Varšavsku i niz drugih srodnih dokumenata iz oblasti međunarodnog zračnog prevoza, kao i da je ova konvencija modernizirana i prilagođena savremenim uvjetima avionskog prevoza u Evropi. Također je napomenuo da Evropska komisija zahtijeva od BiH da se ova Montrealska konvencija ratificira što prije. Sefer Halilović je problematizirao pitanje cijena avionskih karata, koje su kod nas 5 do 10 puta skuplje nego u bilo kojoj drugoj evropskoj zemlji, jer BiH, navodno, još uvijek spada u rizično područje. Izvjestilac nije mogao dati odgovor na ovo, ali je pojasnio da se ova konvencija svakako ne bavi tim pitanjima. Denis Bećirović je potom postavio pitanje o finansijskim konzekvencama po BiH, ukoliko se ratifikuje ova konvencija. Izvjestilac je odgovorio da finansijskih posljedica nema. Potom je predsjednik predložio da se da saglasnost za ratificiranje ove konvencije, uvažavajući pri tome primjedbu g. Halilovića, što je jednoglasno i usvojeno.

Ad.-5. Davanje suglasnosti za ratificiranje Sporazuma između Vijeća ministara BiH Vlade Republike Hrvatske o suradnji u nadzoru državne granice

Samir Rizvo, pomoćnik ministra sigurnosti BiH, dao je uvodne informacije vezane za ovaj sporazum istakavši pri tome da je on zasnovan je na praksi ostalih zemalja Evropske Unije. Primjenom ovog sporazuma bi se unaprijedila sigurnost granica, te bi se potpomoglo u suzbijanju kriminaliteta. Sporazumom su regulisana područja saradnje i koja su to nadležna tijela zadužena za tu saradnju, te oblici saradnje kao što je razmjena informacija, izrada zajedničke sigurnosne procjene, upotreba posebne opreme, posebni oblici saradnje, itd. Denis Bećirović je potom postavio pitanje da li je regulisana granica između BiH i RH. G. Rizvo je odgovorio da nije, ali i da se u ovom sporazumu reguliše

pitanje nadzora granice, a ne njena raspodjela. Potom je jednoglasno data saglasnost za ratificiranje ovog Sporazuma.

Ad.-6. Davanje suglasnosti za ratificiranje Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006)

Izvjestilac Sabrija Šerifović, pomoćnik ministra za vanjsku trgovinu i ekonomske odnose BiH je u uvodu istakao da ovaj sporazum smatra modernim i kvalitetnim, da je potpisan u decembru 2006.godine od strane 10 zemalja regiona, te da je sedam zemalja (Albanija, Bosna i Hercegovina, Hrvatska, Makedonija, Moldova, Crna Gora, Srbija) i UNMIK na Kosovu ostalo njegovim potpisnikom nakon stupanja Rumunije i Bugarske 1. januara 2007 godine u EU. Objasnio je da bi sporazum stupio na snagu 30-og dana nakon ratifikacije, a nakon potpisivanja ovog Sporazuma svi posebni sporazumi o slobodnoj trgovini sa zemljama regiona postaju nevažeći. Očekuje se da sporazum dovede do liberalizacije industrijskih proizvoda do kraja 2008. godine, a poljoprivrednih do kraja 2010. godine. Na početku burne rasprave, Azra Alajbegović je postavila retoričko pitanje da li i šta dobiva BiH ovim sporazumom, tj. postoji li analiza kakve su štete za našu zemlju, te da li postoje mehanizmi zaštite domaćih proizvoda, ali i kontrola uvoznih proizvoda. G. Šerifović je odgovorio da su zaštitne mjere za domaće proizvode predviđene sporazumom, ali su one veoma komplikovane i skupe. Također je članove Komisije upoznao sa odlukom Vijeća ministara BiH o zaštiti domaćih proizvoda u slučaju prekomjernog uvoza, ali i s činjenicom da naši proizvođači te mjere ne žele i neće da koriste. Analize u tom smjeru nisu pravljene jer su predstavnici Ministarstva za vanjsku trgovinu i ekonomske odnose BiH svakog mjeseca išli na pregovore oko detalja ovog sporazuma, a za analitiku treba više i vremena i novca. Naglasio je i da je za pravljenje analiza zadužena Vanjskotrgovinska komora BiH. G. Šerifović je napomenuo i da u Briselu BiH i Srbija nisu parafirale ovaj sporazum. Potom je Sefer Halilović odlučno ustvrdio da je protiv ovog sporazuma jer su poljoprivredni proizvođači u BiH u inferiornom položaju u odnosu na one u susjednim zemljama i smatra da će građani BiH primjenom ovog sporazuma biti u gorjoj situaciji nego do sada. G. Matić je izvjestioca upitao da li su tačne tvrdnje ili špekulacije da su susjedne zemlje Srbija i Hrvatska bolje zaštitile svoje proizvode nego što je to uradila BiH, a g. Šerifović je odgovorio da nijedna država ne može bolje zaštititi svoje proizvode, jer je sporazum jednak za sve. G. Bogdanović je ovome dodao da se radi o multilateralnim sporazumima koji se ne mogu mijenjati, može ih se samo prihvatiti ili ne, te da nema nikakvih uslovljavanja od strane bilo koje od zemalja potpisnica. Ponovio je da je ratificiranje sporazuma o CEFTA i uključenje naše zemlje u zonu slobodne trgovine jedan od preduslova za pristupanje naše zemlje EU. Nakon ovog, predsjednik Komisije je predložio da se da saglasnost za ratifikaciju ovog sporazuma, i ona je data, sa četiri glasa za i dva uzdržana.

Denis Bećirović je potom zatražio objašnjenje o načinu donošenja odluka u Komisiji, a g. Matić se referirao na član 35. Poslovnika Zastupničkog doma koji kaže da „Komisija odlučuje prostom većinom, uz uslov da je prisutna najmanje većina članova, osim konačnih odluka o kojima se ne izjašnjava Dom, kada komisija odlučuje prema proceduri utvrđenoj čl.79.i80. ovog poslovnika, s tim što predsjednik te prvi i drugi zamjenik predsjednika nastoje postići saglasnost.“

Ad.-7. Usmena informacija predsjednika Komisije o susretu sa g. Ali Bagheri-om, generalnim direktorom odjela za Centralnu i Zapadnu Evropu Ministarstva vanjskih poslova Islamske Republike Iran, 11.06.2007. godine

Predsjednik Komisije je članove usmeno ukratko izvjestio o najvažnijim akcentima sa sastanka sa delegacijom Islamske Republike Iran, istakavši da je ovom prilikom upućen zvaničan poziv za predsjednike Komisija za vanjske poslove oba doma PSBiH da posjete Iran do kraja ove godine. G. Matić je iznio prijedlog da to ne budu samo predsjednici, već da to bude delegacija od 5-6 ljudi ispred obje Komisije koja će posjetiti Iran. Također je

članove Komisije upoznao sa stavom Bosne i Hercegovine kada je u pitanju Iranski nuklearni program i spor koji Iranci imaju sa međunarodnom zajednicom i posebno, SAD-om u vezi sa ovim pitanjem. Napomenuo je da je stav BiH da se ovaj spor rješava miroljubivim i diplomatskim putem, pogotovo što Iran predstavlja izuzetno značajan faktor stabilnosti u regionu Bliskog i Srednjeg Istoka i može u punoj mjeri doprinijeti rješavanju dugogodišnjeg sukoba koji na ovom području vlada.

Detaljna zabilješka sa ovog sastanka biće sačinjena i dostavljena članovima Komisije u narednom periodu.

Ad.-8. Usmena informacija predsjedatelja Komisije o susretu sa gđom Marielouise Beck, parlamentarkom njemačkog Bundestaga i članicom grupe prijateljstva Bundestaga sa Bosnom i Hercegovinom

Predsjednik Komisije je članove izvjestio da je posjeta gđe Beck odgođena za 26.-27.06.2007.godine i zamolio, s obzirom da su i on, kao predsjednik Komisije i njegove dvije zamjenice, Azra Hadžiahmetović i Milica Marković, u tom periodu na ljetnom zasjedanju Parlamentarne skupštine Vijeća Evrope, da neko od članova Komisije ugosti gđu Beck. Prijedložio je da to budu Azra Alajbegović i Sefer Halilović, a oni su to prihvatili.

Ad.-9. Tekuća pitanja

Kao što je, na zahtjev Komisije, na jednoj od prethodnih sjednica i obećano, MVP BiH je Komisiji za današnju sjednicu dostavio CD sa svim međunarodnim sporazumima i ugovorima koje je do sada BiH potpisala i/ili ratificirala, ali i onima koji još nisu ratificirani ili ne podliježu ratifikaciji. Ovaj vid elektronski pohranjenih podataka je veoma dobrodošao Komisiji, jer je se šteti prekomjerne količine papira i gomila dokumenata, no članovi Komisije su istovremeno izrazili želju i prijeku potrebu za dobijanjem na korištenje personalnih računara (laptopa), kako bi se ovakvim materijalima mogli efikasno koristiti. Tim više što u okviru Misije OSCE-a u BiH postoji program za parlamentarnu podršku i neke Komisije u PSBiH su već odavno dobile laptope za svoj rad.

Azra Alajbegović je u tom smislu iznijela zahtjev da se pošalje dopis OSCE-u i rukovodstvu PSBiH, te da se zatraže laptopi za Komisiju.

Na kraju je Radomir Bogdanović je pozvao članove Komisije u radnu posjetu Ministarstvu vanjskih poslova BiH kako bi se upoznali sa uvjetima rada i organizacionoj šemi ovog ministarstva.

Sjednica je završila svoj rad u 16h.

SEKRETAR
KOMISIJE ZA VANJSKE POSLOVE
Merdžana Iglica

PREDSJEDNIK
KOMISIJE ZA VANJSKE POSLOVE
Slavko Matić



Kopija: MVP-u BiH